



Saül apres la perte de la bataille se tue, se iettant sur son espée, lequel fut suiuy par son Escuyer.

LE S Philistins ayans gagné la bataille contre Israël, & tué les trois fils de Saül en la montagne de Gelboé, ils poursuiuirent Saül, & toute la charge de la bataille fut tournée contre luy. Quoy voyant Saül, & mesme qu'il estoit navré de flèches par les Archers, & qu'il ne pouoit échapper de la main de ses ennemis, il dist à son Escuyer : Desgaigne ton espée, & me tuë, de peur que par aduventure ces incirconcis icy ne viennent, & qu'ils ne me mettent à mort en se mocquant de moy, & son Escuyer n'en voulut rien faire pour la crainte qu'il auoit ; & ainsi Saül prit son espée, & se ietta sur icelle, & mourut. Ce que voyant son Escuyer il se ietta pareillement sur son épée & mourut avec son maistre. Saül doncques mourut, & ses trois fils, & son Escuyer, & tous les hommes ensemble en ce iour-là. Or les enfans d'Israël qui estoient outre le Iordin, voyant Saül & ses trois enfans morts, abandonnerent leurs citez, que les Philistins occuperent ; & le iour ensuiuant ils dépouïllèrent les occis, & trouuans Saül & ses trois fils morts, ils occuperent la teste de Saül, & enuoyerent ses armes à l'entour de leur terre, pour l'annoncer au Temple des Idoles, puis pendirent son corps sur la muraille de Beth-San : mais les habitans de Iabez Galaad s'acheminèrent de nuict, & prirent les corps de Saül & de ses fils, & les brûlerent au feu, puis enseuelirent leurs os en la forest de Iabez, & ieusnerent sept iours. *1. Des Roys Chap. dernier.*